

# INUIT ATAQATIGIIT INATSISARTUNI



UPA2026/30

23. april 2016

Paarma Lund Kreutzmann

**Kalaallit Nunaanni pinerluttulerinermi inatsisip aamma Kalaallit Nunaanni eqqartuussisarnermik inatsisip allangortinneqarneri pillugit inatsit (Pisortani sulisunut kissaatigineqanngitsumik, innarliisumik nikanarsaasumillu pissusilersornerup pinerluutinngortinneqarnera, inuit atornerlunneqarnerisa pinerluutinngortinneqarnerat, kinguaassiuutinut tunngasumik atortussat innarliissutaasut akiorniarlugit suliniutit patajaallisarneqarnerat, pineqaatissiinerup aalajangersarneqarnerani pissutsit sukannernerulersitsisut, toqutsisutut eqqartuussaasimasut immikkoortortaqarfimmi matoqqasumi pineqaatissinneqarnermik naammassineqarnissaannut inissinneqartarnerat il.il.) pillugu siunnersuutip Kalaallit Nunaanni Namminersorlutik Oqartussanit akuersissutigineqarnissaa pillugu Inatsisartut aalajangiiffigisassaattut siunnersuut**  
(Meeqqanut, Inuusuttunut, Inatsisit Atuutinneqarnerannut Naligiisitaanermullu Naalakkersuisoq)  
Oqaaseqaat

Inuit Ataqatigiinniit , innuttaasut pinerluttulerinermi inatsisitigut innuttaasut sukut tamatigut illersorneqarnissat pingaartitaraat. Taammaattumik Naalaakkersuisunut saqqummiusserat iluareqarput, qujanaq saqqummiussanut.

Siunnersuut tassaavoq arlalitsigut Kalaallit Nunaanni innuttaasut inatsisitigut isumannaatsuunissaannik illersorneqarnissaannillu annertusaasoq.

Inuit Ataqatigiinniit isumaqarpugut tamanna pisariaqartoq aammalu ullutsinnut naleqquttusoq.

Inuaqatigiinni sullissisut kanngunarsaasarneq pillugu, erseqqissumik pinerluuteqarnertut isigineqalernissaa siunnersuutigineqarpoq. Inuit sulerusussullit kikkulluunnit pisariaqartippagut, taamaammallu aamma illersorneqarnissaat pissusissamisoorpoq.

Suliaminnik suliarinninnerminni kanngunarsarneqarnissamik imaluunniit sioorasaarneqarnissamik annilaangassuteqannginnissaat illersorneqartariaqarpoq.

Kinguaassiuutitigut innarliisarnermut tunngasut, soorlu aamma deepfake-tut taaneqartartut eqqarsaatigalugit, pingaaruteqarpoq ineriartorneq malinnaavigissallugu.

# INUIT ATAQATIGIIT INATSIARTUNI



Inatsisitigullu killiliussat tamakkerlugu matussuserneqarnissaat. Aamma pingaaruteqarluinnarpoq inuit atonerlunneqartarnerisa sakkortusisamik isiginiarneqarnissaa.

Soorlu aamma siunnersuutigineqartoq inuit Kalaallit Nunaanni suliffinni naapertuutitngitsumik aammalu inuttut naleqassutsimik innarliisumik atugassaqartillugit sulisitsisoqartillugu inatsisitigut illersugaanissaat.

Inuit innarluutillit aammalu LGBTI-nut siunnersuutikkut erseqqissumik pitsaanerusumik illersorneqalissapput. Tamanna inuiaqatigiinni amerlanerusunik peqataatitsiviusuni ineriartortitsinissamat pingaarutilimmik alloriarneruvoq.

Pineqaatissiissutit pillugit siunnersuut, pingaartumik toqutsinermut tunngatillugu, naapertuuttuuvoq. Inatsisit pinerluutip qanoq ittuuneranut naapertuuttumik ersersitsisumik. Aammalu inuiaqatigiinnut uteqqinnissap (resocialiseringip) isiginiarneqarnissaa pingaaruteqartoq.

Siunnersuummi immikkoortut pingaarnerit 12-it saqqummiunneqartut Inuit Ataqatigiinniit pisariaqartinneqartutut isigineqarput, taamaattumillu Naalakkersuisut siunnersuutaat tapersorsorparput, tassa Kalaallit Nunaanni pinerluttulerinermi inatsimmut allannguutit pillugit Inatsisartut inatsisissaattut siunnersuut akueralugu.